

«Mintga patrun merita mes respect»

Cuira: Referat dal schef da l'armada Philippe Rebord

DA GION NUTEGN STGIER / ANR

■ **L'economia saja in important partenari da l'armada. En cas da smantschas terroristicas saja er il militar pront. La pussanza politica, quella saja oz omnipreschenta. La simpatia tar l'armada saja tar la generaziun giuvna pli gronda che anc avant 30 onns. Quai las lingias grassas dal referat.** Envidà a l'occurrenza cun *Philippe Rebord*, il schef da l'armada, aveva *Lucas Caduff*, il divisiunari e cumandant da la Divisiun Territoriala 3. Il Sursilvan è sa mussà satisfatg da l'interess per il referat cun esser preschentas 150 persunas. Vesì han ins glieud da l'economia, da la politica, da numerus uffizis, da la baselgia e lura dal militar. Caduff ha menziunà l'actività da la Divisiun Territoriala 3. En noss chantun saja ella cunzunt durant il Forum mundial d'economia engaschada, tar catastrofes da la natira ed er savens tar occurrenzas da sport sco l'emna passada tar il Campiunadi mundial da bike a Lai. Servetsch militar fan tar quella divisiun 7500 schuldads e 2700 uffiziers. Dal dumber total deriva bunamain ina terza dal Grischun. En tut ha la divisiun set battagliuns ed il battagliun grischun è il 91.

Nus essan fitg dependents da l'armada

Cusseglier guvernativ *Christian Rathgeb* è cunzunt stà losch da la visita da Rebord. Per il Grischun saja sia preschientscha in'onur. Il schef dal departament da segirezza, militar e sanadad ha ditg che strusch in'auter chantun saja uschè fitg dependent da l'armada sco il Grischun. Las bleras occurrenzas da sport, las catastrofes da la natira ed er anc bleras autras chaussas conferman quai. Rathgeb ha lura er engrazia a Rebord per la bainvuglientscha envers noss chantun. Ses engaschament per mantegnair la piazza d'armas da Cuira ed er ils ulteriur quatter plazs da militar en noss chantun saja exemplaric, ha punctuà Rathgeb. El ha ditg ch'er il chantun sa mettia en che quai restia uschia.



Divisiunari Lucas Caduff durant ses referat.

FOTO G. N. STGIER

Be pli 100 000 schuldads

Philippe Rebord, el che stat al timun da noss'armada, ha ditg che da preschent haja l'armada anc 100 000 schuldads. 0,7% da quel dumber che fetschia militar sajan dunnas. In fatg plaschaivel saja che l'interess per l'armada saja oz tar la generaziun da 18–30 onns per in pau pli grond che anc avant bun 30 onns. La generaziun da mez, 30–60 onns, quella haja damain simpatia per l'armada. Il schef da l'armada ha er ditg ch'ils giuvenns sajan en nagin cas il problem da la Svizra. En general sajan els patriots e tiers in tschert individualissem durant il servetsch militar existia tar tuts ina buna collegialità ed er ina prontatad da gidar. Ultra da quai stimian ils giuvenns ed er ils schuldads las valurs da la Svizra. Els enconuschian er quellas valurs.

Singuls privels

Er sche la Svizra saja neutrala, in tschert privel saja adina avant maun. En l'ave-

gnir vegnia il privel da «Cyber», attagas sin datas personalas, generalas, systems da segirezza ed infurmaziun a s'augmentar ferm. La Svizra saja dal reminent l'emprima naziun ch'haja introduci ina recruta per spezialists da «Cyber». Oz saja infurmaziun bain impurtanta, dentant per vegnir tar infurmaziuns haja er mintgin da dar infurmaziuns. Gist quai saja er il cas tar l'armada. Rebord ha lura er ditg che mintga patrun e che tut las persunas ch'hajan da far cun l'economia sajan da gronda impurtanza per l'armada. Quai cumenza cun ina buna scolaziun e lura cun la generusadad da laschar ir ils emploiads a militar e da surpigliar la paga da quels. El haja tut respect da mintga patrun, ha punctuà il schef da l'armada.

Mintga chantun muntagnard dovra il militar

En il chantun Grischun haja l'armada ina fitg buna infrastruttura e da quella

saja dad avair quità, ha ditg Rebord. Per l'armada saja mintga chantun muntagnard da gronda impurtanza, er cun l'armada adina puspè gidar tar catastrofes ubain er cun far lavurs per organisaziuns etc. Il Grischun haja lura er in ferm stab da crisa cun la regenza, las organisaziuns communalas, la polizia e la protecciun civila. Er il Forum mundial d'economia saja ina occurrenza nua che l'armada sappia far bunas experientschas sco strusch en auters lieus. Rebord ha er ditg che Cuira survegnia segir ina nova caserna, cura che quai saja, sappia er el betg. Las tractativas cun la confederaziun, il chantun e cun la citad da Cuira sajan bunas. Da renunziar als tschintg lieus da l'armada en il Grischun (Cuira, Valragn, Luzisteig, Breil e S-chanf) na saja nagin tema a Berna, ha ditg il cumandant da corp. Cunzunt Cuira resta en il profil da l'armada in punct fitg impurtant cunzunt er sco bun lieu da scolaziun.